

Esnan cu mester worde extradita a worde crusifica prome cu extradicion tuma lugar

ORANJESTAD(AAN) Tur hende ta papia di extradicion y e asunto aki a bira un problema grandi na Aruba, tanto den pueblo como den politica pasobra te awe e entreguistanan ta sigui gaña pueblo cu tin suficiente garantia pa esnan cu mester worde extradita.

Ta parce cu esnan cu mester worde extradita ya caba a haya nan caso den corte na Merca y a ser sentencia como culpable pasobra ta tur hende ta papiando di e posibilidad, si nan por bin sinta nan castigo na Aruba si o no.

Te hasta ministranan ta haci como si fuera cu tur esnan cu mester bay duna cuenta den corte riba teritorio Mericano, ya caba ta culpable pasobra

ministranan tambe ta papia cu esnan cu mester worde extradita mester bin sinta nan castigo na Aruba.

Mientras cu un persona cu ta worde persigui pa ley no ser sentencia den un corte oficial, e ta keda solamente como sospechoso o acusado y no por papia di awor caba cu e yiunan di tera cu worde extradita mester bin sinta nan castigo na Aruba, sin cu nan caso a ser trata den corte na Merca.

Ta logico y mas cu claro cu gobierno di Aruba y parlamento mester exige cu si yiunan di tera ser sentencia den exterior y den e caso aki na Merca, anto cu nan mester por bin sinta nan castigo na Aruba, si ta for di aki nan a ser extradita.

Di otro banda mirando e actitud di cierto Estadonan na Merca, ta dificil pa kere cu Arubianonan lo haya e derechonan cu nan tin pa medio di tratadonan internacional, si no mucho dia pasa un gobernador di un Estado na Merca a bay linea recta contra decision di e corte mas halto na mundo y asina tog nan a laga

ehecuta un Paraguayo.

Esnan cu mester bay duna cuenta den corte na Merca, di antemano caba tin un desventaja grandi pasobra na Merca nan ta carga di antemano caba e stigma di ta Latino Narco Traficante y lo bay ta dificil pa asumi cu un grupo di hurado, consistiendo di ciudadanonan y no huristanan manera cu den nos sistema si ta e caso, cu nan lo por duna un veredicto husto y honesto sin prehuicio.

Esaki no ta kita afor cu esnan cu sa cu nan ta inocente, lo bataya cu e armanan di defensa cu ta na nan disposicion y haci todo por todo pa bringa contra un sistema hudicial cu ta controversial y hopi cuestiona rond mundo.

Mientras cu ningun hende a ser sentencia y haya culpable y cu nan caso no a ser trata den apelacion na Merca, ningun hende na Aruba por asumi di antemano cu Arubianonan cu awor ta riba e lista di extradicion, cu nan ta culpable.

Ban spera cu esnan cu ta inocente, cu poder di Dios por gana nan caso den un

tratamiento di corte husto y esnan cu mester toca e mala suerte di a ser haya culpable sea berdad o no, cu nan por bin sinta nan castigo na Aruba

pasobra keto bay mester ta asina cu yiunan di tera mester worde castiga na Aruba mes y no na otro pais.

Investigacion den KIA

ORANJESTAD.(AAN): Keto bay tin investigacion ta tumando lugar den KIA.

Esaki ta relaciona cu entre otro droga cu a wordo haya na un forma masha sospechoso y ministerio den baño net djis banda di sala di corte.

Tin fuerte indicacion cu e caso aki lo mira luz di dia.

Mientras tanto tambe un preso cu a ricibi bishita, a wordo haya cu cierto cantidad di droga.

Parce un bishitante lo a pase o deposita esaki den su camisa na momento di despedida.

Despues aparentemente guardianan atento lo a nota cu algo lo a cay na suela.

Mesora nan a drenta den accion pa averigua kico esaki lo ta y contene.

A resulta cu ta trata aki di

Coca cu ta pisa varios gram. Verbaal a wordo traha di e caso aki y lo wordo trata tambe den corte di justicia.

E señora of señorita cu lo ta wordo sospecha di a comete e acto lo a wordo interroga tambe pa efectivonan di seccion anti droga, segun informe.

Tambe a tuma lugar un pela formal entre dos preso cu ta sinta nan castigo relaciona cu droga.

Di un manera of otro un di e detenidonan lo a pasa man pa un stul di hero y a klap e otro cune.

Consecuentemente su contrincante a keda herida na pia.

Alto mando di e instituto lo a tuma e medidanan apropiada pa evita confrontacion entre grupo Aruba y esnan di exterior cu ta deteni den KIA.

Mulanan ta cay pa loco

ORANJESTAD.(AAN): Ta manera un keintura ta tumando lugar e ultimo dianan aki relaciona cu trafico di droga.

Awor ta un otro nacionalidad a cay; den caso di ayera ta un Italiano.

E Italiano cara di "Bambino" a trata di burla e control severo cu fucionarionan crioyo di Douana ta haci.

E compai tabata na punto di abordaje avion di KLM rumbo pa Hulanda, pero su maleta a wordo control y den esaki a haya casi 10 kilo di Coca puro.

Ta parce manera cu e isla aki a para bira e ultimo tempo di ta kibrando tur record di captura di mulanan.

Mientras trabao ta birando mas duro pa efectivonan, tin cu busca traductor tras di otro relaciona cu diferente mulanan di varios pais, cu ta cay tras di otro den man di autoridad local.

E ultimo tempo a wordo gara Surnameo, Hulandes, Spaño, Aleman, Ingles Croata, Ghanes, Colombiano, Turco, Venezolano, Mericano, Dominicano, Hondureño, Jamaquino, Salvadoreño, Isla Ariba, Curasoleño, Grenada, Puertorriqueño, pa no lubida Arubianonan tambe.

E control lo bira mas severo y palabra ta na corte di justicia pa implementa castigo severo pa mundo henter comprobe trafico na no ta wordo tolera na Pais Aruba.

TELEFONNAN DI DIARIO
826747- FAX 828551

YOU BETTER LISTEN TO THIS MAN!!

